

四庫全書

史部

欽定四庫全書

史部

唐會要卷四十三至九

詳校官編修臣溫汝适

編修臣程嘉謨覆勘

總校官降調編修臣倉聖脉

臣

校對官中書臣王學海

謄錄監生臣吳蔭松

欽定四庫全書

唐會要卷四十三

彗

宋 王溥 撰

武德九年二月十三日有星孛於胃昴之間二十八日又有星孛於卷舌

貞觀八年八月二十三日有星孛於虛危歷玄枵凡十一日乃滅太宗問虞世南曰是何妖也對曰齊景公時有

彗見晏嬰對曰穿池畏不深起臺榭畏不高行刑畏不重是以彗為公誠耳景公懼而脩德十六日而星滅臣聞政德不脩雖麟鳳數見終無補也苟政教無闕雖有災變何損於時伏願陛下勿以功高古人而自矜大勿以太平而自驕情慎終如始彗何足憂太宗曰吾十有八舉義兵二十四定天下二十九即帝位三代以來撥亂之主莫臻於此頗有自矜之意以輕天下之士此吾之罪也上天見變良有是乎秦始皇平六國隋煬富有

四海既驕且逸一朝而敗吾亦何得自驕也言念於此
不覺惕懼魏徵進曰自古帝王未有無災變者但能脩
德災變自銷溫彥博進曰宋公一言星三徙陛下見變
而懼災其銷乎十三年三月二十二日有星孛於畢昴
十五年六月十九日有星孛於太微犯郎位七月甲戌滅
總章元年四月有彗見於五車之上避正殿減膳令內
外五品已上各上封事極言得失許敬宗上言星雖孛
而光芒小此非國青不足上勞聖慮請御正殿復常膳

不從敬宗又進曰星孛於東北王師問罪此高麗將滅之徵上曰我為萬國之主豈得推過於小藩哉二十一日星滅

上元二年十月十三日彗見於角亢之南長五尺

三年七月二十一日彗見於東井指北河積薪長三尺餘漸向東北光芒益長半天掃中台指文昌宮經五十八日乃滅

永隆二年九月一日萬年縣女子劉靜凝乘白馬著白

衣男子從者八九人入太史局昇令廳床座問比見有
何災異太史令姚玄辨執之以聞是夜彗見天市中長
五尺漸小向東行出天市至河鼓左旗十七日滅永淳
二年三月十八日彗見於五車之北凡二十五日滅
文明元年七月二十二日西北方有彗長丈餘經四十
二日滅

光宅元年九月二十九日有星如半月見西方

景龍元年十月十八日彗見於西方四十二日滅

二年七月七日孛見於胃昴之間

三年八月八日有孛於紫微宮

太極元年七月四日有彗入太微宮

延和元年六月彗自軒轅入太微至大角滅

時睿宗以
為彗者除

舊布新之象乃
下詔傳位太子

開元十八年六月十一日彗見於五車三十日孛見於
畢昴二十六年三月八日有星孛於紫微垣厯北斗昴十
餘日皆陰雲不見

乾元三年四月二十七日彗見於東方在婁角間色白長四尺疾行向東北厯昴畢觜參井鬼柳軒轅宿至太微西右執法星西七尺許滅凡經五十餘日

上元元年閏四月二十一日妖星見於西方長數丈至五月滅

大厯元年十二月十七日彗見於匏瓜侵宦者星長尺餘色赤二旬滅 五年四月二十七日彗出於五車長五丈餘六月二十八日滅

元和十二年正月戊子彗見於畢南指西南凡三十日
南近參旗滅

長慶元年正月二十一日有孛於東南方二十九日又
有孛於辰上

太和二年七月甲辰彗出右攝提南二尺

八年九月辛亥夜彗起太微近郎位西北五尺乃滅庚
申彗復出艮方張三尺芒耀甚偉

開成二年二月丙午夜彗出東方長七尺在危西指辛

酉彗復出長丈餘直西行稍南指在虛一度半壬戌夜
漸長二丈餘廣三尺在女九度三月乙丑夜彗長丈岐
分兩尾其一指氐其一掩房至戊申漸長八丈西北行
在張十四度

勅尚食云自後每一日食料分為
十日仍傳內中脩造以荅天譴

三年三月十九日有彗於辰上長二丈餘二十日又見
於辰上長三丈五尺二十一日又見於辰長三丈餘西
指軫東南星二十二日又見於辰長三丈五尺餘西指
軫魁

四年正月三十日有彗見於室南厯壁奎婁胃等宿至
閏月二十三日又見於卷舌北凡三十有三日後二十
四日二十五日陰二十六日晴已滅

會昌元年十一月六日有彗見於西南室宿之分凡五
十六日滅

大中十一年九月乙未彗出於房長三尺

光啓二年五月有孛於箕尾厯北斗攝提

天祐二年四月甲辰夜彗起北河貫文昌長三丈在西

北方詔特放京畿諸司禁囚常赦不原外罪每遞減一
等限三月內踈理其年五月乙酉夜西北彗星長六十
餘尺自軒轅大角及天市西垣光芒甚偉其長竟天

五星臨犯

武德五年十二月甲戌太白犯軒轅

七年六月二日熒惑犯左執法

尚書右僕射蕭瑀
上表遜位不許

八年九月二十二日熒惑入太微

九年五月傳奕密奏太白見秦秦國當有天下高祖以

狀授太宗及太宗即位召傅奕謂汝前奏事幾累於我然今日之後但須悉心盡言無以為慮

貞觀十三年五月熒惑犯右執法

司空長孫無忌上表請遜位不許

十五年二月十五日熒惑逆行犯太微東藩上相

十七年正月

月十七日特進魏徵卒

闕

四月六日吏部尚書

闕

六月十九日尚書右僕射高遜位

闕

七月二十日司空房玄齡

憂

十七年三月七日熒惑守心前星十九日退

權萬紀及齊州平賜祐子宅其月二十二日又犯鉤陳

四月一日大理囚紀千承基上變稱太子承乾漢王元昌等謀反六日太子廢爲庶人元昌並賜死

九月二十九日熒惑犯太微西藩上將

十九年九月二十四日太白在太微左執法光芒相及

十二月十四日

侍中劉洎賜死

永徽三年六月二日熒惑犯左執法三日太白入太微

犯右執法

闕

顯慶五年二月三日熒惑入南斗

麟德元年七月十四日太白犯太微左執法

乾封三年五月十日熒惑入軒轅

咸亨元年十二月熒惑入太微

上元二年正月九日熒惑犯房星

儀鳳四年四月九日熒惑入羽林

調露二年五月二十四日太白經天

長安四年八月及鎮星犯天關

太史令嚴善思奏曰法有亂臣伏罪臣下謀上

之象歲餘誅

張易之兄弟

神龍元年九月十一日熒惑犯左執法

闕

景龍三年六月八日太白晝見於東井

景雲二年二月二十七日太白入羽林

太極元年二月三日熒惑入東井四月十三日熒惑與
太白守東井

先天元年八月十六日太白襲月

開元十年七月二十九日熒惑入南斗

天寶十三年五月熒惑守心五十餘日

至德元年十一月二十六日熒惑與太白同犯昴

大曆四年三月三日熒惑守上相經二十一日退入氐房

七月十二日熒惑入羽林

九年六月十三日熒惑入太微

貞元三年閏五月戊寅太白晝見四十餘日

其年六月癸卯熒惑退行入羽林

六年五月戊辰太白與月并間容一指戊寅熒惑犯鎮星不及者一十八年十月乙酉太白犯太微左執法十年夏四月太白晝見

貞元十一年八月熒惑太白犯上將星

其年北平王馬燧薨

二十一年正月己酉太白犯昴

永貞元年十二月己酉歲星犯太微西垣

元和十五年七月庚申熒惑退行入羽林

長慶元年八月壬辰太白犯太微西垣

四年二月辛巳太白犯東井北轅三月甲子熒惑犯歲星壬申太白犯東井八月丁丑熒惑犯鎮星癸未犯東井丁亥復入東井己丑太白犯軒轅在角

寶曆元年九月癸未太白犯南斗

太和六年九月癸卯熒惑入太微犯右執法

九年八月二日太白犯太微

其年九月八日熒惑犯氐西南星二十八日又犯鉤鈐

開成元年十月三日熒惑入氐

二年五月十二日太白犯畢十月二十五日又犯房
三年五月五日又犯輿鬼

其年六月一日太白犯熒惑二十八日犯右執法十月
七日又犯南斗

會昌元年九月癸巳熒惑犯輿鬼閏九月丁酉貫鬼宿
戊戌在鬼中

二年六月乙丑熒惑犯歲星丙寅太白犯東井

三年七月癸巳熒惑合赤色動搖於井中至八月十六

日犯輿鬼

四年五月戊午太白犯鎮

五年二月五日太白掩昴北側在昴宿一度五月辛酉
太白入畢口巨星東南一尺八月七日太白犯軒轅大
星九月二十九日熒惑犯上將星

大中十一年八月熒惑犯東井

星聚

武德二年三月二十七日太白辰鎮聚於東井

九年六月十一日辰歲會於東井二十三日辰歲又會於東井

貞觀十八年五月太白辰合於東井

十九年九月太白入太微

時太宗平高麗初下白巖城也

二十年七月丁未歲星守東壁

景雲二年七月太白鎮同在張宿

太極元年四月熒惑太白同守東井

至德二年四月乙酉太白與熒惑集於東井

乾元元年四月庚戌熒惑與鎮星聚於營室

闕

大曆三年七月五星聚於東井九月四星聚於井

貞元四年乙亥熒惑歲鎮三星聚營室三十餘日

六年閏四月庚戌太白辰聚於東井

元和十一年五月丁卯辰星與歲合東井六月己未辰

星歲星合於東井相去一尺十一月戊子鎮熒惑合於

虛危

十三年八月丁丑太白辰星歲星聚於軫

太和九年八月三日太白熒惑合於角五度

開元四年正月丙辰熒惑太白辰合於斗

流星

武德三年十月三十日有流星墜於東都城內殷殷有聲高祖謂侍臣曰此何祥也起居舍人令狐德棻曰司馬懿之伐遼東也有流星墜遼東梁水上尋而其主敗走晉軍追之至其星墜所斬之此即三凶滅亡之兆也

貞觀十二年五月甲辰有星狀如月西南流三丈乃滅
十八年五月五日有星大如斗出東壁光照地

景龍二年二月十九日天保星墜於西南有聲如雷野
雞雉

景龍二年八月十七日東方有流星出五車至上台又
歲星犯左執法

蘇氏議曰吉凶悔吝惟人所召人守中道天不上變
豈有位登宰輔名踐國公以諂諛為政事用姦妄為

身計而欲上無災異下就乂寧其可得乎先天之誅
天道不昧矣

其年九月十二日北方有流星出中台至相滅

十月三日
辛亥

石郭元振張說
李日知並罷相

太極元年正月二十一日有流星出太微至相而滅

天寶三年閏二月十七日有流星如月墜於東南有聲

元和二年十二月己巳西北角有流星有尾迹散落亘

天

九年四月辛巳北方有大流星尾迹長五丈光照地至
右攝提西三尺滅

十一年正月壬辰夜有流星長二丈餘出天井之西有
尾迹

十三年七月庚寅有星色白尾長一丈五尺東南入濁
八月未東方一大流星其色赤西流至危滅

十五年五月己亥西北有大流星長二丈餘出北斗魁
南抵軒轅而滅 其年七月癸亥有大流星出鉤陳南

至婁北滅

寶曆元年閏七月庚子有流星出北極至南斗柄滅
二年七月丙戌日初出有流星向南滅八月丙申北方
有大星長四丈餘出王良流至北斗柄滅

長慶元年正月丙辰南方有大流星色赤尾迹長三丈
光明照地出狼星北三尺東北流至七里南三尺滅
其年六月己丑東方有大流星色黃有尾迹長六尺光
明照地出參西北西流至羽林滅

二年八月丙子東方有大星西流至昴滅有聲如雷

四年七月丙子有大星出大將軍東北流入相滅

其年十一月甲午夜西北有流星出閣道至北極滅

太和四年六月辛未南方有流星尾迹凝著天良久不滅

九年六月二十三日有流星縱橫大小約有二十餘出沒多近天河

開成元年十一月十日西方有流星大如一斗器光明

照地尾跡凝著天良久不滅出上台經中台西北滅

三年四月二十一日東方有流星尾迹凝著天良久不滅出天市中帛星經宗人星東南滅

其年七月六日未後東北方有流星尾迹光明三丈餘滅其聲如雷九月五日上方向有流星尾迹凝著天光明照地至室宿向南滅

四年二月三十六日從四更至五更上方及四方約有流星大小共二百餘並西流皆有尾迹長二丈或三丈

至五丈三月二十三日一更至五更上方及四方有流星凡百餘交橫出滅

其年八月卒未夜有流星出羽林尾長八十餘尺滅後有聲如雷十月二十六日南方有流星尾迹凝著天光明照地出參右足近九旂南滅

會昌元年六月二十九日從一更至五更有小流星五十餘於四方交橫散流七月二日北方有流星光明照地東北流有聲如雷十一月六日有大流星光明照地

東北流有聲如雷六年二月丁酉東北流星色赤其光燭地尾迹入大角西流穿紫微

山摧石隕

武德六年七月二十日雋州山崩遠水咽流

貞觀八年七月七日隴右山崩大蛇屢見太宗問秘書

監虞世南曰是何災異對曰春秋時梁山崩晉侯召伯宗而問焉對曰國主山川故山崩水竭君為之不舉樂降服出次祝幣以禮焉晉侯從之故得無害漢文帝九

年齊楚地二十九山同日崩文帝出令郡國無來獻施
惠於天下遠近歡洽亦不為災後漢靈帝時青蛇見御
座晉惠帝時大蛇長三百步經市入廟今蛇見山澤中
深山大澤寔生龍蛇亦不足怪也唯脩德可以銷變上
然之

永徽四年八月二十日隕石十八於同州馮翊光曜有
聲如雷上問于志寧此何祥也當由朕政之有闕也對
曰春秋隕石於宋五內史過曰是陰陽之事非吉凶之

生自古灾變竟不可測但恐物之自然未必關於人事
今陛下發書誠懼責躬自省未必不為福也

開元十七年四月五日大風震電藍田山開百餘步

大厯十三年十一月柳州黃岑山摧震殺數百人

貞元十五年正月柳州藍山縣山摧得古鐘四枚

水災

貞觀十一年七月一日黃氣竟天大雨穀水溢入洛陽
宮深四尺壞左掖門毀宮寺一十九所損六百餘家中

書舍人岑文本上疏曰伏惟陛下覽古今之事察安危之機上以社稷為重下以億兆在念明選舉慎刑罰進賢才退不肖聞過即改從諫如流為善在於不疑出令期於必信順神養性省畋遊之娛去奢從儉減工役之費務靜方內而不求闢土載橐弓矢而無忘武備凡此數者唯陛下行之不怠當轉禍為福變咎為祥况水之為患陰陽常理豈可謂之天譴而係聖心哉特進魏徵諫曰昔貞觀之始聞善若驚暨五六年間猶悅以從諫

自茲厥後漸惡直言雖或勉強時有所容非復曩時之
豁如也謇諤之士稍避龍鱗便佞之徒肆其巧辨謂同
心者為朋黨謂告訐者為至公謂強直者為擅權謂忠
謹者為誹謗謂之朋黨雖忠信而可疑謂之至公雖矯
偽而無咎強直者畏擅權之議忠謹者慮誹謗之尤至
於竊斧生疑投杼致惑正人不得盡其言大臣莫能與
之爭熒惑視聽鬱於大道妨理損德其在茲乎而欲無
水之災不可得也其月十三日詔曰暴雨為灾大水汎

濫靜思厥咎朕甚懼焉文武百寮各上封事極言朕過
無有所諱諸司供進悉令減省凡所作役量事停廢遭
水之處賜帛有差二十日廢明德宮及飛山宮之玄圃
院分給河南洛陽遭水戶

九月黃河汎濫溢壞陝州河北縣及太原倉毀河陽中
潭白馬坂以觀之

永徽五年六月七日潯池河水泛溢損千三百家

總章二年七月冀州大雨壞居人屋宇凡一萬三千三

百九十家害田四千四百九十六頃九月十八日處州
海水翻上壞永嘉固二縣百姓廬舍六千八百四十
三家溺死人九千七十牛五百頭苗四千一百五十頃
咸亨四年七月二十七日婺州暴雨山水泛溺死者五
千人

永淳元年五月十四日連澍雨二十三日洛水溢壞天
津橋損居人千餘家

文明元年七月温州大水損四千餘家

如意元年七月一日洛水溢損居人五千餘家

神龍元年七月洛水暴漲壞百姓廬舍二千餘家溺死者數百人八月一日以水災令文武九品以上直言極諫右衛騎參軍宋務光上疏曰伏見明制令文武九品以上直言極諫大哉德音真堯舜之用心禹湯之罪已也臣嘗謂天人相與之際休咎冥符之兆有感必通其間甚密是以政失於此變生於彼亦猶影之象形響之赴聲動而輒隨各以類應故曰天垂象見吉凶聖人象

之竊見自夏已來水氣勃戾郡國多罹其灾去月二十
七日洛水暴漲漂損百姓臣謹案五行傳曰簡宗廟廢
祠祀則水不潤下夫王者即位必郊祀天地嚴配祖宗
是故鬼神歆饗多獲福助自陛下光臨寶極綿厯炎涼
郊廟遲留不得殷薦山川寂寞未議懷柔水之貽灾殆
因此發臣又按水者陰類臣妾之道陰氣盛滿則水泉迸
溢加以虹蜺紛雜澍雨滯霍雖丁厥時而汨常度亦陰
勝之沴也臣恐後庭近習或有離中饋之職干外朝之

政伏願陛下深思天變杜絕其萌以萬方為念不以聲色為娛以百姓為憂不以犬馬為樂慙勞宵旰用緝明良豈不休哉夫災變應天寔繫人事故日食修德月食修刑若乃雨暘或愆則貌言為咎雩災禳患之法存乎禮典今暫降霖雨即閉坊門棄先聖之明訓遵後來之淺術時偶中者安即神耶蓋當屏翳收津豐隆戢響之日也豈有一坊一市遂能感召皇靈暫開慙閑使欲發揮神道必不然矣何其謬哉至今巷議街談共呼坊門

為宰相謂能節宣風雨變理陰陽天工人代乃為虛設
悠悠蒼生復何望哉尚書右僕射唐休璟以水雨為害
咎在主司上表曰臣聞天運其工以人代之而理神行
其化為政資之以和得其理則陰陽以調失其和則災
沴斯作故舉才而授帝惟其難論道於邦官不必備頃
者始自中夏及乎首秋郡國水災屢為人害夫水陰氣
也臣實主之臣忝職右樞致此陰沴是不能調理其氣
而乃曠居其官雖運屬堯年卒無治水之用位侔殷相

且闕濟川之功猶負明刑坐逃皇譴皇恩不棄其若天
何昔漢家故事丞相以天灾免職臣竊遇聖朝豈敢覲
顏居位乞解所任待罪私門冀移陰咎之徵復免夜行
之責

二年四月洛水漲壞天津橋損居人廬舍死者數千
人

唐會要卷四十三

欽定四庫全書

唐會要卷四十四

宋 王溥 撰

水災下

開元八年六月二十一日東都穀洛瀍三水溢損居人
九百六十一家溺死八百一十五人許衛等州番州掌
管溺死者一千一百四十八人

十四年七月十七日瀍水暴漲入洛損諸州租船數百

艘損租米十七萬二千八百石十八日懷惠鄭汴滑濮
大雨人皆巢居死者千計

大厯四年京師大雨水斗米直八百他物稱是命閉市
北門置一十一臺臺高五尺上置五方壇壇上立一黃
旛以祈晴

貞元三年閏五月東都河南江陵大水壞人廬舍汴州
尤甚揚州江水泛漲四年八月連雨灞水暴溢溺殺
渡者百餘人八年八月河北山南江淮凡四十餘州

大水漂溺死者二萬餘人又幽州奏七月大雨水深一丈已上鄭涿薊檀平等五州並平地水深一丈五尺十月徐州奏從五月二十五日雨至七月八日方止平地水深一丈二尺苗田屋宇漂蕩倒塌村閭向盡百姓多就高處及移居鄰郡

十一年復州竟陵等三縣遭卽蜀二水泛漲沒溺損戶一千六百六十五田四百一十頃

十二年福建等州大水六月嵐州暴雨大水深二丈餘

損屋宇田苗 十五年鄭滑大水 十九年蔡申光等

州水賜物五萬段米十萬石鹽三千石以賑貧民

永貞元年九月郎州武陵龍陽二縣江水暴漲漂萬餘
家十一月京兆府長安等九縣山水泛漲害田苗

元和元年十二月幽州徐州水損田苗

二年蔡州上言大水平地水深八尺 三年京師大雨

水 四年七月渭南縣暴水泛溢漂損廬舍二百一十

三戶秋田十有六頃溺死者千人命京兆府發義倉救

命 十年正月振武界黃河溢毀東受降城五月饒撫
虔吉信五州山水暴風沒毀廬舍虔州水甚深處四丈
餘 八年許州大水推大嵐山其年六月庚寅京師大
水風雨毀屋揚瓦人有壓死者水積於城南深數丈餘
入明德門猶漸車輻辛卯渭水暴漲絕濟者一日時所
在霖雨百源皆發川澮多不由故道 九年十二月淮
南宣州大水 十三年五月昭應雨水流溺居人是月
衢州山水湧出三丈餘蕩州郭百姓溺死損田千餘頃

是月浮梁樂平二縣暴雨百姓溺死者一百七十人其
為漂泛不知所在者四千七百戶闕兩稅錢三萬五千
貫十一月潤常陳許四州以水害聞田不發者萬餘頃
十二月京兆府水害田苗潤常湖衢陳許六州大水
十二年六月京師大雨舍元殿一柱傾市中水深三尺
壞坊民二千家河北水災邢洛尤甚平地或深二丈
十三年六月淮水溢壞人廬舍十二月奉先等十一縣
水害麥田十五年九月滄景大雨敗田三百頃壞屋舍

二百九十間又江西奏吉州大水

長慶二年七月好時山水泛漲漂損居人三百餘家其
月詔陳許兩州災頗甚百姓廬舍漂溺復多言念疲氓
豈忘救恤宜賜米粟共五萬石充賑給令度支先於管
內見收貯米粟充本道觀察使審勘責所漂溺貧破人
戶量家口多少作等第分給聞奏

寶歷元年七月乙酉廊坊大水其年九月華州暴雨傷
稼

太和二年六月陳州水害秋稼其年八月京畿奉先等
十七縣水 三年七月宋亳水害秋稼 四年九月舒
州太湖宿松望江大水災溺民戶六百八十詔本道以
義倉斛斗賑貸其年十一月京畿河南江南湖南等道
大水害稼詔本道節度觀察使出官米賑給 五年六
月蘓杭湖三州雨水害稼東川奏彥武江水漲二丈餘
壞州城居人廬舍 六年二月以去歲蘓湖大水宜賜
米二十二萬石以本州常平善倉斛平充給 其年十

一月滁州奏清流等三縣四月雨至六月諸山破洪水
漂溺戶一萬三千八百

開成二年八月山南東道諸州大水田稼漂盡丁酉詔
大河西南幅輳千里楚澤之北連亘數州以水潦暴至
堤坊潰溢既壞廬舍復損田苗言念黎元罹此災沴宜
令給事中盧允宣刑部郎中崔瑒宣慰

火

貞觀二十三年三月少府監甲弩庫火

證聖元年正月十六日夜明堂災至明並為煨燼

景龍四年二月東都凌空觀殿宇並煨燼唯一真人獨存目有淚迹

開元十八年二月十一日大雨雪俄又震雷飛龍廐災
天寶二年六月七日應天門觀災延至左右延福門經
日火不滅 九年三月西廟災 十年正月陝州運船
火燒船二百一十五隻損米一百萬石舟人死者六百
人商人船數百隻八月六日夜武庫災二十八間十九

架燒兵器四十七萬事

廣德元年十二月二十五日夜鄂州失火燒船三千隻
延及岸上居人二千餘家死者四千餘人

貞元七年四月蘇州大火 十三年正月東都尚書省
火 十九年四月家令寺火 二十年四月開業寺火

元和四年三月御史臺佛舍火當直御史李應罰一季
俸 七年六月鎮州甲仗庫火延燒一十三間兵器皆
盡王承宗久蓄叛謀至是凶器消息 十年四月河陰

轉運院火盜所為也是日昏暮有盜發于河橋凡數十人縱發弓矢人吏奔駭因圻毀院門又東葉蕪火以焚之十一月盜發獻陵寢宮永巷十一年十一月元陵火罰守陵官一月俸十二月未央宮及飛龍草場火

十二年五月 缺

十四年十一月戊寅度支火十五年正月京師西市火焚死者衆

太和二年十一月禁中昭德寺火延燒宣政殿之東垣

及門下省至午北風起火勢益甚迨暮方息初火發上
命神策兵士救之公卿內臣聚于日華門外御史中丞
溫造不到與兩巡使崔蠡姚合等各罰一月俸 八年
五日飛龍神駒中廐火 九年六月西市火

開成四年十二月乾陵火

會昌三年六月萬年縣東市火燒屋貨財不知其數又
西內神龍寺火

大順二年七月汴州相國寺佛閣災是日晚微雨震電

寺僧見塊火在三門藤網中良久火發復飛越前殿延
燒佛閣二夕方止

木冰

儀鳳三年十一月十四日雨木冰其月三十日黃門侍
郎同三品來瑱卒四年正月十日戶部尚書許圜師卒
二十九日尚書右僕射戴至德卒

開元二十九年十一月二十二日雨木冰凝寒凍裂數
日不解寧王憲見而嘆曰此俗謂之樹架諺曰樹架達

官怕必有大臣當之而死矣二十四日寧王憲薨
大歷二年十一月辛未紛霧如雪草木冰

螟蜮

貞觀二年六月十六日終南等縣蝗上至苑中見蝗掇
數枚而呪之曰人以穀為命而汝食之是害于百姓也
百姓有過在予一人爾其有靈但當蝕我無害百姓將
吞之侍臣曰恐致疾遽來諫止上曰所冀移災朕躬何
疾之避遂吞之自是蝗不為災

開元四年五月山東諸州大蝗分遣御史捕而埋之汴
州刺史倪若水拒御史執奏曰蝗是天災自宜修德劉
聰時除既不得為害滋深宰相姚崇牒報之曰劉聰偽
主也德不勝妖今日聖朝也妖不勝德古之良守蝗蟲
避境若言修德可免彼豈無德致然今坐看食苗忍而
不救因此飢饉將何自安卒行焚瘞之法獲蝗一十四
萬石投之汴水流下者不可勝數朝議喧然上復以問
崇崇對曰凡事有違經而合道有反道而擇權者彼庸

儒不足知之縱除之不盡猶勝養以成災上又曰殺蟲
太多有傷和氣公其思之崇對曰若救人殺蟲因緣為禍崇
所甘心八月己卯二十四日敕河南河北檢校殺蝗蟲
使狄光嗣康瓘敬昭高道昌賈彥璿等宜令待蟲盡看
刈禾有次序即入京奏事諫議大夫韓思復以為蝗是
天災當修德以禳之恐非人力所能剪滅上疏曰臣聞
河南河北蝗蟲頃日更益繁熾經歷之處苗稼都損今
漸環飛向西游食至洛使命來往不敢昌言山東數州

甚為惶懼且天災流行埋瘞難盡臣望陛下悔過責躬
發使宣慰損不急之務召至公之人上下同心君臣一
德持此誠實以答休咎前後驅蝗使等伏望總停上出
思復疏以付姚崇崇乃請思復往山東檢覈蝗蟲所損
之處還具實奏

貞元元年四月自春大旱麥枯死禾無苗關中有蝗百
姓捕之蒸暴飈去足翅而食之五月有蝗起自東海至
西隴坻羣飛蔽天旬日不息所至苗稼無遺八月大旱

關中有蝗百姓捕之蒸暴颶去翅足而食人心大恐
開成二年六月魏博淄青河南府並奏蝗害稼七月乙
酉京兆尹李紳奏蝗入京畿不食民田詔書褒美仍刻
石以紀之 三年八月魏博六州蝗食秋苗並盡
四年十二月鄭滑兩州蝗充海中都等縣並蝗

五年四月鄆州充海管內並蝗又汝州有蟲食苗五月
河南府有黑蟲生食田苗汝州管內蝗充海臨沂等五
縣有蝗蟲于土中生子食田苗六月淄青登萊四州蝗

蟲河陽飛蟲入境幽州管內有地蝻蟲食田苗魏博河南府河陽等九縣沂密兩州滄州易定鄆州陝府虢州六縣蝗

會昌元年三月鄧州穰縣蝗

咸通三年五月淮南河南蝗 九年江夏飛蝗害稼

光啓二年二月荆襄仍歲蝗米斗三十千人相食

雜災變

貞觀十三年四月二十九日雲陽石燃方丈晝如灰夜

即光見投草木于其上則焚歷年乃止 十七年閏六月司農寺豕生子一首八足自頸分為二體 其年七月京師訛言官遣張張殺人以祭天狗云其來也身衣狗皮指如鐵爪每于暗中捕人道路傳聞更相震怖皆穀弓矢以自防太宗惡其妖訛命夜間諸防宣旨慰之稍定

永徽五年七月萬年宮有小鳥生大鳥

龍朔元年十二月二十八日洛州言貓鼠同居

調露元年突厥溫傳等未叛有鳴鵠羣飛入塞相繼蔽野邊人相驚曰此鳥一名雀南飛突厥犯塞之候也至二年正月還復北飛至靈夏已北悉墮地而死視之則無頭矣裴行儉問于右史苗神客曰鳥獸之祥乃應人事何也對曰人雖至靈而稟生含氣同于萬類故吉凶兆于彼而禍福應于此聖人受命龍鳳為嘉者和氣同也故漢高斬蛇而驗秦之必亡仲尼感麟而知已之將死大鳥飛集昌邑以敗是以君子虔恭寅畏動必思義

雖在幽獨如承大事知明神之照臨懼患難之及已也
雉昇鼎耳殷宗側身以修德鵬止坐隅賈生作賦以叙
命卒無患者德勝妖也

垂拱元年九月二十四日揚州地生毛如馬鬣

長壽三年三月大雪鳳閣侍郎蘓味道以為瑞修表將
賀左拾遺王求禮止之曰三月降雪此災也乃誣為瑞
若三月雪是瑞雪臘月雷為瑞雷乎乃止

神龍二年三月九日洛陽東七里有水影側近樹車馬

皆歷歷影見水中月餘乃滅四月己亥雨毛于趙州之鄆縣

景龍元年九月十八日有赤氣竟天其光燭地經三日止

唐隆元年六月八日虹蜺竟天

開元十五年七月四日雷震興教門兩鵠吻欄檻及柱災

蘓氏駿曰東海有魚虬尾似鵠因以為名以噴浪則

降雨漢栢梁災越巫上厭勝之法乃大起建章宮遂
設鵠魚之像于屋脊畫藻井之文于梁上用厭火祥
也今呼為鵠吻豈不誤矣哉

天寶元年十月一日魏郡上言猫鼠同乳經二十六日
望編入史冊詔從之

寶應元年七月西北方有赤光亘天貫紫微漸流于東
彌漫北方照耀數十里

大厯三年六月二十四日隴右節度使奏言隴州汧源

縣趙貴家猫養鼠衆以為瑞中書舍人崔祐甫上議曰
中使吳承倩宣進止以猫鼠示百寮者臣聞禮曰迎猫
為其食田鼠也然則猫之食鼠載在禮典以除其害則
雖微必錄今猫對鼠而不食仁則仁矣無乃失其性乎
猫受人養棄職不修亦何異乎法吏不勤觸邪疆吏不
勤扞敵又按禮部式具列三瑞無猫不食鼠之目以茲
稱慶臣所未詳

建中四年天下地生毛

貞元二年正月大雨雪平地深尺餘雪上有黃黑色狀如浮埃五月日有赤暈自辰及申方散

四年正月上御丹鳳樓宣赦是日含元殿前階檻三十餘間崩甲士死傷者十餘人又陳留雨水皆大如指長寸餘每木有孔通中所下其立如植二月太僕郊牛犢生六足卿周浩白宰臣李泌請上聞泌戲答之而不許其時京城民家豕生子兩首四足以白御史中丞竇叅亦不許上聞七月自陝州至河陰水盡黑其黑水流入

汴河止于汴州城下一宿而復又鄭汴二州羣鳥皆去
界內入田緒李納境內銜木為城高二三尺緒納令焚
之信宿復如之鳥口多流血十年十一月有大鳥飛集
宮中食雜物數月獲之不食而死

十二年十二月大雪平地二尺竹多死環王國所獻犀
牛甚珍愛之至是凍死

十七年二月丁酉京師雨雹已亥雨霜戊申夜震霆雨
霜庚戌大雨兼雹

元和元年京師大風折樹

三年四月大風毀含元殿西闕欄干十四間 七月六日舒州上言桐城縣梅天陂內有青黃白三龍自陂中乘風雷躍起高二百尺六里入浮塘陂

八年三月丙子大風壞崇陵寢殿鵠吻折門戟六月四日長安西市有豕生子三耳八足自尾分為二

長慶二年六月乙丑大風震電墜太廟鵠吻及御史臺樹皆仆其年十一月頻雪後恒燠水不冰凍草木萌發

如正二月 四年六月庚辰大風吹敗延喜景風門
寶歷元年十二月乙酉夜有霧起須臾遍天霧上有赤
氣或深或淺久而乃散

開成元年閏五月有羣鳥萬餘集唐安寺逾月方散
四年四月壬戌有麋出太廟

大中十一年十二月舒州奏有鳥人面綠毛喙皆紺色
其聲曰甘人呼之為甘蟲

咸通元年七月戊戌白虹橫亘西方其年十一月丁酉

成時妖星初出如匹練亘空化為雲而沒在楚分

廣明元年四月大雨雹大風拔京兩街樹十二三東都
長夏門內古槐自拔而仆宮殿鴟吻皆墮地

中和元年五月大風天雨土 二年七月丙午夜西北
有赤氣如絳竟天其年九月太原上言諸山桃杏有花
結實其年十月西北方無雲而雷鳴天狗墮

光啓二年九月白虹見西方

光化二年春有白氣竟天如練自西南徹東北而旋

天祐元年四月東京大風雨跬步不辨物色日晡稍止
是年昭宗移洛陽車馬以其日入京城而有是變全忠
革命之兆也其年十一月辛酉日有黃色白暈旁有青
赤紐

太史局

久視元年五月十九日勅太史局為渾天監不隸秘書
省天后召尚獻輔拜太史令固辭曰臣久從放誕不能
屈事官長遂改為渾天監至七月六日又改為渾儀監

長安二年八月二十八日獻輔卒渾儀監依舊為太史局隸秘書省緣進所置官員並廢

景龍二年六月二十六日改為太史監罷隸秘書省

景雲元年七月二十八日又改為太史局隸秘書省八月十日又改為太史監十一月二十一日又改為太史局
二年閏九月十日又改為渾儀監

開元二年二月二十一日又改為太史監

十五年正月二十七日改為太史局隸秘書省至天寶

元年十月三日改為太史監罷隸秘書省至乾元元年三月十九日太史監改為司天臺仍置五官正五人司天臺內別置一院名之曰通玄院應有道術人並徵辟到京皆于通玄院安置司天臺總置官六十員大監一名正三品少監二人正四品上丞三人正六品上主簿三人正七品上主事三人正八品下五官正各一人正五品上副正各一人正六品上五官靈臺郎各一人正七品下五官保章正各一人從七品上五官挈壺正各

一人正八品上五官監候各一人正八品下五官司歷
各一人從八品上五官司辰各三人正九品上觀生歷
生七百二十六人其臺宜于永寧坊張守珪宅置制曰
建邦設都必稽玄象分曹列局皆應物宜靈臺二星主
觀察雲物天文正位在太微西南今興慶宮上帝廷也
考符所合以致靈臺宜令所司量事修理舊置在秘書
省南至寶應元年六月九日司天少監瞿曇謨奏司天
丞請減三員監候減二員司辰減七員五陵司五員敕

旨依至天寶十一年三月十四日敕太史監官除朔望朝外非別有公事一切不須入朝及充保識仍不在點檢之限

大足元年九月十九日敕在史局厯生天文觀生等取當局子弟充如不足任于諸色人內簡擇

開元二十三年九月八日敕太史局厯生每番留兩人當上餘並七月一日上至十月三十日下

乾元元年十月一日權知司天監韓穎奏司天台五官

正既職配五方上稽五緯臣請每至正冬朔望朝會及諸大禮并奏本方事各依本方正色其冠上加一星珠仍永為恒式從之

大厯二年正月二十七日敕艱難已來疇人子弟流散司天監官員多闕其天下諸州官人百姓有解天文玄象者各委本道長吏具名聞奏送赴上都

開成五年十二月敕司天臺占候災祥理宜秘密如聞近日監司官吏及所由等多與朝官并雜色人交游既

乖慎守須明制約自今已後監司官吏並不得更與朝官及諸色人等交通往來仍委御史臺訪察

雜錄

武德九年八月詔私家輒立妖神妄設淫祀非禮祈禱一切禁斷龜易五兆之外諸雜占亦皆禁止

載初元年六月敕相書及測驗家書多妄論禍福並宜禁斷

開元十年六月敕百姓不得與卜祝人交游往來

唐會要卷四十四

欽定四庫全書

唐會要卷四十五

宋王溥撰

功臣

武德元年八月六日詔曰朕起義晉陽遂登皇極經綸
天下寔仗宏材尚書令秦王右僕射裴寂等或合契元謀
或同心運始並蹈義輕生捐家殉節艱辛備履金石不
移論此忠勤理宜優異官爵之榮抑惟舊典勲賢之議

宜有別恩其罪非叛逆可聽恕一死及所司進簿尚書
右僕射裴寂納言劉文靜加恕二死左驍衛大將軍長
孫順德右驍衛大將軍劉弘基都水監趙文恪右屯衛
大將軍竇琮衛尉少卿劉政會鴻臚卿劉世龍吏部侍
郎殷開山左翊衛大將軍柴紹內史侍郎唐儉庫部郎
中武士彠驃騎將軍張平高左驍衛長史許世緒李思
行李高遷等並恕一死

三年二月十日詔曰貴爵尚苗列代通規進善優賢有

國彛訓尚書左僕射魏國公寂太子少保新昌縣公綱
左武侯大將軍陳國公抗太常卿沛國公元壽納言漢
東郡公叔達內史令宋國公瑀兵部尚書蔣國公通戶
部尚書滎陽郡公善果右武侯大將軍羅侯御史大夫
滑國公無逸並職司近侍任無心膺恩禮所加義從隆
渥寂已下奏事及侍立並令升殿其年三月隋尚舍奉
御郭宏道來歸引見帝泣曰臣識龍顏在天下之先今拜
闕庭在衆人之後遂拜同州刺史每參見奏事並升殿

九年九月二十四日詔曰褒賢昭德昔王令典旌善念
功有國彛訓吏部尚書上黨縣公長孫無忌中書令臨
淄縣侯房玄齡右武侯大將軍尉遲敬德兵部尚書建
平縣男杜如晦左衛將軍金椒縣子侯君集等或夙叅
謨謀綢繆帷幄竭心傾懇備申忠益或早從任使契闊
戎麾誠著艱難績宣內外義冠終始志堅金石誓以山
河寔允朝議無忌封齊國公玄齡封邢國公敬德封吳
國公如晦封萊國公君集封潞國公邑各三千戶遣侍

中陳叔達於殿階下以名唱之上謂曰朕敘公卿勲勞
量定封邑恐不能盡當宜各自叙叔父淮安王神通進
曰義旗初起臣率兵先至今房玄齡杜如晦等刀筆之
人功居第一臣竊不服上曰義旗初起人皆有心叔父
雖率悍兵未嘗身履行陣山東未定受委專征建德南
侵全軍陷沒及劉闢翻動望風而破今計勲行賞玄齡
等有籌謀帷幄定社稷之功所以漢之蕭何雖無汗馬
指蹤推轂故得功居第一叔父於至親誠無所愛但以

不可緣私濫與勲臣共賞耳初將軍邱師利等咸自矜其功或攘袂指天以手畫地及見淮安王理屈自相謂曰陛下以至公行賞不私其親吾屬何宜妄訴

貞觀六年九月宴於慶善宮時有班居尉遲敬德上者敬德怒曰汝有何功合坐我上任城王道宗因解諭之敬德拳毆道宗目幾眇太宗不憚而罷嘗謂敬德曰朕舊覽漢史見漢高祖功臣獲罪者多意常尤之及居大位以來恒欲保全功臣令子孫無絕然卿居官輒犯憲

綱方知韓彭為戮非漢祖之薄國家大事唯賞與罰非分之恩不可數行勉自脩飾無貽後悔數年敬德遂飛鍊金石閒居服雲母粉穿築池臺常奏清商樂以自奉養不與外人交通凡十六年至顯慶三年十月卒許敬宗請加贈上曰敬德功業誰之儔也對曰武德末年二凶構亂經綸中興之業能置宗廟之安者敬德功當第一太尉無忌曰敬德早從征伐勲庸明著貞觀之初特効殊績比諸將帥超越等倫李靖南定荆吳北伐突厥

外內之功雖別論其勲効實宜相準上以為然遂贈司徒并州都督

十七年二月二十八日詔曰自古皇王褒崇勲德既勒名於鐘鼎又圖形於丹青是以甘露良佐麟閣著其美建武功臣雲臺紀其跡司徒趙國公無忌故司空河間元王孝恭故司空萊國公如晦故太子太師鄭文貞公徵司空梁國公玄齡開府儀同三司鄂國公敬德故右僕射宋國公瑀故揚州都督忠壯公志玄輔國大將軍

夔國公弘基故尚書左僕射蔣國公通故陝東道大行
臺尚書右僕射鄖國公開山故荊州都督譙襄公紹故
荊州都督邳襄公順德洛州都督鄖國公張亮吏部尚
書陳國公侯君集故左驍騎大將軍郾襄公公謹左領
軍大將軍盧國公程知節故禮部尚書永興文懿公虞
世南故戶部尚書渝襄公劉政會戶部尚書莒國公唐
儉兵部尚書英國公李世勣故徐州都督胡莊公秦叔
寶等二十四人宜酌故實弘茲令典可並圖畫凌烟閣

庶念功之懷無謝於前載旌賢之義永貽於後昆

永徽三年十二月二十八日勅功臣貞觀二十三年已
來簡退者特宜同致仕例其太原元從及秦府左右仍
各加階先有正四品者不在此例

五年二月四日詔屈突通殷開山並贈司空長孫順德
贈開府儀同三司竇琮贈特進史大奈贈輔國大將軍
溫大雅贈尚書右僕射權宏壽贈太子少師劉政會武
士彥並贈并州都督張公謹贈荊州都督李高遷贈梁

州都督李思行贈洪州都督張平高贈潭州都督時武
昭儀用事贈其父故引功臣以贈之

總章元年二月六日詔太原元從西府舊臣今觀詳覽
其為等給贈司徒士彥贈司空開山贈司空淮安王神
通并州都督劉宏基并州都督劉政會并州都督唐儉
左衛大將軍竇琮荊州都督長孫順德梁州都督史大
奈贈幽州都督龐卿惲潭州都督錢九隴贈華州刺史
柴紹贈潭州刺史張平高贈工部尚書裴寂洪州都督

李思行洪州都督秦行師靈州都督許世緒涼州都督
李高遷齊州刺史劉義節贈太尉高士廉贈司空屈突
通贈太尉房玄齡贈司空杜如晦贈司徒尉遲敬德楊
州都督段志玄益州都督程知節徐州刺史秦叔寶涼
州都督宇文士及荊州都督張公謹荊州都督杜君綽
荊州都督公孫武達涼州都督李安遠代州都督鄭
仁泰荊州都督李孟嘗幽州都督獨孤彥雲始州刺
史劉師立並為第一功臣其家見在朝無五品已上官

者子孫及曾孫擢一人授五品官若先有四品五品者加授子孫等一人兩階若三品已上加爵三等其第二等功臣見在朝無五品已上官者其子孫及曾孫擢一人授從六品若有五品已上者加一人階六品官者加兩階三品已上官者加爵一等時皇后欲褒崇其父特在功臣之上故也

神龍元年二月制段志玄屈突通蕭瑀李靖秦叔寶長孫順德劉宏基宇文士及錢九隴龐弼卿惲竇琮范君璋

李子和張平高張公謹梁洛仁安脩仁秦行師獨孤彥
雲蘇定方李安遠鄭仁泰杜君綽李孟嘗等二十六家
所食實封並依舊給

其年九月勅自弘道以前經任相三年已上及秦府晉
府寮佐四品已上并食實封功臣雖經罪責不至破家
子孫無任京官者特宜優與一官英府周府舊寮五品
已上子孫亦宜準此

至德二年十二月十五日勅扈從劍南締構靈武冊勲

共三十二人太子太師幽國公韋見素加開府儀同三司三百戶開府儀同三司齊國公高力士加封三百戶右龍武大將軍潁川公陳元禮封蔡國公封三百戶左龍武大將軍鴈門男田長文封鴈門郡公封三百戶左龍武大將軍南陽男張崇俊封鴈門郡公封三百戶左羽林大將軍鳳翔伯杜休祥封馮翊郡公封三百戶尚書左僕射裴冕加開府儀同三司封冀國公封三百戶殿中監同正判行軍李輔國加開封儀同三司行殿中

監封五百戶宗正卿兼工部侍郎李遵加特進封鄭國
公封二百戶鴻臚卿中軍都虞候李鼎加開府儀同三
司封保寧郡公封一百戶鴻臚卿同正中軍都知兵馬
使管崇嗣封鉅鹿郡公封三百戶右武衛大將軍王統
加特進太原縣侯封一百戶尚書左僕射同中書門下
平章事朔方軍節度使子儀加司徒代國公封一千戶
鴻臚卿朔方兵馬使僕固懷恩封曹國公封二百戶右
金吾衛大將軍四鎮伊西北庭行軍兵馬使李嗣業加

兼衛尉卿封虢國公封二百戶司徒兼戶部尚書太原
尹同中書門下平章事荊郡公光弼加司空兼兵部尚
書封薊國公封八百戶御史大夫兼工部尚書招討兩
京并定遠武衛興平等軍兼關內節度使河西隴右伊
西四鎮行軍兵馬使王思禮加開府儀同三司封霍國
公封五百戶太常卿同正兼御史大夫淮南西道節度
採訪使潁川郡公來瑱加開府儀同三司潁國公封二
百戶太僕卿南陽太守知襄陽郡事金卿公魯昊加開

府儀同三司岐國公封二百戶京兆尹京畿採訪計會
招討宣慰使崔光遠加特進禮部尚書鄭國公封三百
戶開府儀同三司李光進封范陽郡公封二百戶右相
苗晉卿加特進行侍中韓國公封五百戶憲郡尚書同
中書門下平章事李麟加金紫光祿大夫封褒國公封
五百戶中書侍郎同中書門下平章事崔圓加特進行
中書令趙國公封五百戶中書侍郎同中書門下平章
事河南節度採訪使張鎬加銀青光祿大夫南陽縣公

太子少師房琯加金紫光祿大夫河南郡公太子少保
號王巨加光祿大夫御史大夫趙國公李岵加金紫光
祿大夫戶部尚書吏部尚書郇國公韋陟加光祿大夫
禮部尚書李峴加光祿大夫行御史大夫兼京兆尹封
梁國公戶部侍郎蘇震加銀青光祿大夫吏部侍郎
大歷十四年閏五月詔司徒兼中書令汾陽郡王子儀
宜號尚父兼太尉中書令加實封通前二千戶月給千
五百人糧二百四馬芻穀

其年六月一日制條武德已來宰相及實封功臣子孫
沉翳者量與一人正員官七月二十六日吏部奏請委
史館精加檢勘審定名跡至建中元年九月五日史館
奏武德已來寔封陪葬配饗功臣名跡崇高者一十一
人第一等司空魏國公裴寂納言魯國公劉文靜太
尉趙國公長孫無忌尚書左僕射衛國公李靖司空英
國公李勣中書令漢陽王張柬之中書令崔元暉侍中
平陽王敬暉侍中扶陽王桓彥範中書令南陽王袁恕

己尚書左僕射徐國公劉幽求

二十四人第二等司空河間王孝恭開府儀同三司鄂國公尉遲敬德特進莒國公唐儉輔國大將軍夔國公劉弘基輔國大將軍邳國公長孫順德行臺尚書左僕射蔣國公屈突通行臺尚書右僕射鄆國公殷開山戶部尚書渝國公劉政會工部尚書應國公武士彠荊州都督譙國公柴紹揚州都督襄國公段志玄右驍騎大將軍郾國公張公謹右領軍大將軍盧國公程知節徐

州都督胡國公秦叔寶禮部尚書永興縣公虞世南工
部尚書武陽縣公李大亮散騎常侍豐城縣男姚思廉
左武侯大將軍邢國公蘇定方夏官尚書耿國公王孝
傑右武衛大將軍韓國公張仁愿光祿卿琅邪郡公王
同皎兵部尚書代國公郭元振尚書左丞相燕國公張
說兵部尚書中山郡公王暉等

三十四人第三等司空淮安王神通特進江夏王道宗
中書令鄧國公宇文士及行臺左僕射鄴國公竇軌太

府卿葛國公劉義節左屯衛大將軍襄武郡公劉師立
右驍衛大將軍梁國公安興貴右武衛大將軍申國公
安脩仁左衛大將軍譙國公竇琮夔州都督息國公張
長遜黔州都督吳國公李子和右光祿大夫羅國公張
平高左監門大將軍榮國公樊興左武侯大將軍邠國
公錢九隴右武侯大將軍沔陽郡公孫武達左武衛大
將軍懷寧縣公杜君綽右驍衛將軍安化縣公龐卿憚
涼州都督廣德郡公李安遠涼州都督同安郡公鄭仁

秦刑部尚書吳興郡公沈叔安右領軍大將軍號國公
張士貴右衛大將軍安國阿史那社爾右武衛大將軍
琅琊郡公牛進達輔國大將軍嘉川郡公周護仁右武
候大將軍天水郡公丘行恭尚書左僕射宋國公唐休
璟右武衛大將軍遼陽王李多祚吏部尚書齊國公崔
日用戶部尚書越國公鍾紹京左武衛將軍平陽郡公
薛訥右金吾大將軍涼國公李延昌光祿卿申國公許
乾輔中書侍郎趙國公王珣特進鄧國公張暉等

至德己來將相功效明著已亡歿者

八人第一等尚書左僕射冀國公裴冕吏部尚書清河
郡公房琯門下侍郎衛國公杜鴻漸開府儀同三司武
城郡王李嗣業衛尉卿顏杲卿常山郡太守袁履謙御
史中丞張巡將軍南霽雲

八人第二等大尉臨淮王李光弼兵部尚書涼國公李
抱玉司空霍國公王思禮御史大夫劉正臣范陽長史
賈循尚書右僕射信都郡王田神功左羽林大將軍薛

景仙睢陽太守許遠

七人第三等太子太師幽國公韋見素侍中韓國公苗
晉卿尚書左僕射趙國公崔圓尚書右僕射辛雲京尚
書右僕射扶風郡王馬璘右散騎常侍太原尹鄧景山
史館奏按史傳考詳事實約為三等具件如前勅旨宜
付尚書省百寮與史官對定奏聞

建中元年十二月勅國初以來將相功臣名跡崇高功
效顯著者宜差次分為二等其月定武德以來宰臣以

房玄齡杜如晦蕭瑀高士廉魏徵王珪戴胄岑文本馬
周劉洎褚遂良于志寧張行成高季輔韓瑗來濟張文
瓘郝處俊李義琰裴炎蘓良嗣狄仁傑婁師德王方慶
王及善魏元忠姚崇朱敬則蘇瓌宋璟魏知古陸象先
張嘉貞李元紘韓休張九齡三十七人為上等竇威陳
叔達等四十人為次等功臣以裴寂劉文静長孫無忌
河間王孝恭李靖李勣尉遲敬德屈突通殷開山劉弘
基長孫順德唐儉柴紹段志玄劉政會張公謹程知節

秦叔寶虞世南李大亮蘇定方王孝傑張柬之崔玄暉
敬暉桓彥範袁恕已張仁愿劉幽求崔日用郭元振張
說王琚王峻三十四人為上等淮安王神通等五十人
為次等

至德已來將相既沒者以裴冕房琯杜鴻漸李嗣業劉
正臣顏杲卿袁履謙張巡許遠盧奕南霽雲十一人為
上等李光弼等十五人為次等

二年六月中書令郭子儀自蒲來朝子儀勲伐居最代

宗不名常呼為大臣洎幸陝還賜以鐵券圖形凌煙閣
及上即位恩禮益厚每謁見乘肩輿入自光順門以造
內殿崇貴近古無匹及病上御紫宸殿命舒王謨制書
省之是日子儀薨上聞傷痛久之為廢朝五日冊命曰
尊為尚父官協太師雖爵秩則同而禮望尤重歛以衮
冕旌我元臣聖祖園陵所宜陪葬軾墓重文終之德象
山追去病之勲千載如存九原可作可贈太師仍令所
司備禮冊命贈絹三千匹布千端米麥三千石凶喪所

須並令官給及葬上御安福門臨哭送之百寮陪位特賜諡為忠武配饗代宗廟庭

興元元年正月一日赦文諸軍諸使諸道應赴奉天及進收京城將士等宜並賜名奉天定難功臣身有過犯遞減罪三等子孫有過犯遞減二等四月詔諸軍從奉天隨從將士並賜名元從奉天定難功臣從谷口已來隨從將士賜名元從功臣

貞元元年八月詔九廟配饗功臣封爵廢絕者宜令紹

封以時饗祀

三年三月冊拜李晟為太尉兼中書令

四年詔為晟立五廟贈晟高祖之隴州刺史贈曾祖嵩
澤州刺史贈祖思恭幽州大都督及令官給牲牢祭器
牀帳禮官贊儀以祔焉尋詔晟長子愿為嫡嗣兼監察
御史特拜銀青光祿大夫太子賓客賜上柱國使其得
列榮戟五年九月晟與侍中馬燧召見于延英殿上嘉
其有大勲力乃詔曰昔我烈祖乘乾坤之滌盪掃隋李

之荒屯體元御極作人父母則有熊羆之士不二心之
臣左右經綸參翊締構昭文德恢武功威不庭康不乂
用端命于上帝俾懷柔于四方宇宙既清日月既貞王
業既成太階既平乃圖厥容列於斯閣懋昭績敘表式
儀刑一以無忘於朝夕一以永垂于來裔君臣之義厚
莫重焉貞元己巳歲孟秋七月我行西宮瞻宏閣崇構
見老臣遺像顙然肅然和敬在色想雲龍之叶應感致
業之艱難覩彼思今取類非遠且功與時並才為代生

苟蘊其材過其時尊主庇人何代不有在中宗則桓彥
範等著推戴之績在玄宗則劉幽求等中翼奉之勲在
肅宗則郭子儀掃殄氛祲今則李晟等保寧朕躬咸盡
力肆勤光復宗祏繼之前烈夫豈多謝闕而未錄孰謂
旌賢況念功紀德文祖所為也在予曷其敢怠有司宜
叙年代先後各圖其像列於舊臣之次仍令皇太子書
朕是命紀于壁焉庶永播嘉庸昭示天下俾後之來者
知元勲之不朽於是史官考其功績第其前後以褚遂

良蘇定方郝處俊等二十七人充之復命皇太子書其
文以賜晟刻石於門左

七年二月詔授張巡男去病涇陽令許遠男峴饒州司
馬南霽雲男承嗣溫州別駕顏真卿男羣府河中心戶
曹叅軍顏杲卿孫謨左內率府兵曹叅軍旌忠烈之後
也

九年八月太尉兼中書令西平郡王晟薨上聞之震悼
出涕比大飲遣使親致書於柩前曰皇帝遣宮闈令第

五守進伸旨於故前太尉兼中書令西平郡王贈太師
之靈曰天祚我邦是生才傑稟陰陽之粹氣寔山岳之降
靈宏濟艱難保佑王室掃盪氛祲廓清上京忠誠感于
人神功業施於社稷匡時定亂實賴元勲方將與國同
休永為邦翰比嬰疾恙雖歷旬時日冀痊除重期相見
弼予在位終致和平豈圖藥餌無徵奄至薨落君臣之
義追慟益深循省遺章倍增感切卿一門胤嗣朕必終
始保持況愿等兄弟承卿教訓朕之志義豈忘平生卿

縱不言朕亦存信比者卿在之日却未見朕深心今朕
與卿長乖冀知朕誠志無以為念發言涕零是用躬述
數行遣中祈懷得盡臨紙遣使不能飾辭魂而有知當
體朕意時初城鹽州復鹽池上賜宰臣新鹽惻然思歲
命致鹽於靈座又時遣中使至歲第存撫諸子教戒備
至每聞其子愿等有一善上喜形於色鴻猷盛業恩寵
始終自古及今無與歲比其年十月司徒兼侍中馬燧
對於延英殿初燧以足疾許不朝謁是日燧以冬首朝

請上召命對無拜而坐謂之曰曩故太尉晟常與公俱
來今獨睹公不覺悲慟歎歎久之既而燧請退病甚仆
於地不能興上親起之送於階命中貴人扶掖燧頓首
泣謝而出先是燧自平汴宋魏博河中其功益高上乃
下詔褒美遷光祿大夫兼侍中并賜宸宸台衡二銘并
序勒石於起義堂西偏上為題額其恩寵如此

十七年三月成德軍節度使檢校太尉兼中書令王武
俊薨廢朝五日羣臣詣延英奉慰如渾瑊故事太常諡

曰威烈上曰武俊竭忠奉國賜諡忠烈

元和二年七月錄配饗功臣之後以蘇瓌孫繫為京兆府司錄參軍崔玄暉孫元方張說孫整並為監察御史狄仁傑孫玄範為右拾遺敬暉孫元亮袁恕已孫師德相次錄用焉

四年三月上覽貞觀故事嘉魏徵諫諍匪躬乃詔令京兆尹訪其子孫及故居則質賣已更數姓為九家矣上愍之出內庫錢二百萬贖之以賜其孫侔及善馮等禁

其質賣

六年九月勅奉天定難功臣子孫有犯殺人宜令所司
準法其餘並準處分

八年勅張茂昭立功河朔舉族歸朝義烈之風史冊攸
載嘗聞身歿之後家無餘財追懷舊勲特越常典宜歲
賜絹二千匹春秋二時支給

其年八月詔曰君臣運合故徇國以忘家勸賞義明在
褒功而顯節存則酬其爵祿歿則錄其子孫然後忠義

不遺典章斯在故礪晉隰等州觀察使檢校兵部尚書
康日知故徐州刺史兼御史大夫李涇等一十家皆有
懋功藏于盟府故命搜訪後裔光賁前人今志寧等或
服式著緒或從官有成或投迹軍府之中或滯才州縣
之職咸皆甄錄各茂官榮庶乎有祿者無忘于聿脩懷
忠者使知其必報勉膺光寵無替前勞

十五年六月勅以大理正段文通為殿中侍御史前淮
南營田副使為殿中侍御史顏顥為刑部員外郎長安

縣縣丞顏諗權知大理正渭南縣尉郭承嘏為監察御史
並準二月五日制勲閤之後可任臺省官者故有此命
太和二年六月詔曰朕詳觀列聖遺型祖風盛業昭
然在前其或道有污隆政有善否未始不繫乎當時輔
弼常因便殿言諸宰臣勉其忠益叶心推戴且以去歲
乙巳登應門敷大號俾疇賢相以訪遺裔或血食不繼
宗祊有闕至如遂良之委笏而諍名垂史書仁傑之恢
復廟社事形先覺宋璟之文吏骨鯁功叅治平元紘之

守規畫一持成有裕其冑僅存不絕若髮各授邑吏使其自試其故中書令褚遂良五代孫處可汝州臨汝縣尉內史狄仁傑曾孫元封懷州脩武縣尉侍中宋璟曾孫激岳州沅江縣尉中書侍郎李元紘曾孫伉鄧州向城縣尉

大中二年正月三日勅節文功臣墳墓無子孫者委所在長吏差人巡檢

其年七月十一日史館奏續選堪上凌煙閣功臣除所

有舊圖形并有子孫在中外任官令寫進外三十七人
禮部尚書兼門下侍郎平章事李峴侍中永寧郡公王
珪吏部尚書戴胄中書令岑文本中書令馬周中書令兼
修國史韓瑗侍中兼修國史郝處俊納言婁師德文昌
左相王及善同鸞臺鳳閣平章事朱敬則侍中梁國公
魏知古尚書左丞中書門下同三品陸象先中書令張
九齡司空魏國公裴寂納言魯國公劉文靜中書令漢
陽郡王張柬之
中書令博陵郡王崔玄暉侍中扶陽郡

王桓彥範尚書左僕射劉幽求兵部尚書郭元振吏部
尚書房琯常山郡太守袁履謙北庭行營節度使李嗣
業主客郎中河南節度副使張巡睢陽太守許遠御史
中丞盧奕右驍衛將軍南霽雲中書侍郎蕭華中書侍
郎張鎬司徒李勉平章事監脩國史張鎰門下侍郎蕭
復兵部侍郎平章事柳渾檢校司空平章事賈耽北平
郡王馬燧東都留守李愬敕旨宜令御史臺散牒諸州
尋訪子孫圖寫真形進送

三年四月宰臣奏伏以勲德之後慶賞所延每有恩制多令訪錄所以興廢繼絕尊賢報功事歸勸獎義主沉翳近日諸家自論者衆吏曹官闕合用者稀縱欲比擬亦未詳悉應前件兩色子孫準前後制勅令搜訪與官者望許于吏部陳狀便委磨勘如審是嫡嗣未有官名者具狀聞奏非時與一正員解褐官如有出身及已曾任官者選日優與處分如自以才行嘗登科第及有諸房子孫不承祭祀并及先因獎錄已授正官者並不在

此限即冀所加恩例式叶本條勅旨宜依

咸通九年正月五日安南觀察使高駢奏愛州日南郡
北五里有故中書令河南元忠公褚遂良墓前都護崔
耿大中六年因訪立墳別立碑記云顯慶三年歿于海
上殯于此地二男一孫祔焉伏乞尋訪苗裔護喪歸葬
從之仍勅嶺南各委本道搜訪如有褚氏事跡相類者
尋訪聞奏當加優憫

乾符六年十月京兆府奏故尚父子儀廟因霖雨倒塌勅

減賜御膳錢三千貫顧丁匠修築仍令所司明年仲春以太牢祭于廟時禮部員外郎崔祐甫與諫官俱稱過當章疏屢上宰臣亦相次奏之惟中書舍人李拯上疏請行前詔乃以太牢祀之

其月勅以故衛國公李德裕孫延吉起家為集賢校理天祐元年七月中書門下奏西都舊有凌煙閣盡圖國初功臣今遷都東京乞委營造一閣圖寫梁王全忠勅旨令于皇城內擇地營造仍賜名天祐旌功之閣

唐會要卷四十五

欽定四庫全書

唐會要卷四十六

宋 王溥 撰

前代功臣

永徽三年九月詔以周司沐大夫裴融贈尚書左丞封孝琰有功前代擢其子孫旌之

其年五月詔隋儀同三司豆盧毓御史中丞游楚客齊侍中崔季舒給事黃門侍郎裴澤並標忠烈其子孫令

所司量材叙用先是有詔追錄前代忠鯁子孫周相州
總管尉遲迴曾孫文禮訴言迴忠於周室為隋所誅上
遣議之太常卿江夏王道宗等議皆以迴死節於周宜
有甄錄褚遂良進曰竊窺史籍咸以救君難為忠不救
則為逆春秋趙穿弑晉靈公趙盾為正卿不討賊太史
書曰趙盾弑其君由此言之尉遲迴受周重寄既聞隋
文作相稱兵鄴下南通於陳北達突厥頓兵六十餘日
不赴國難免其罪惡為幸若謂之忠鯁臣所深惑羣議

然之

封建雜錄上

崔氏曰蘇冕所載封建篇蓋以貞觀初太宗文皇帝
嘗欲法周漢故事分圭以王子弟裂地以封功臣諸
儒議論紛紜事卒停寢故有表疏可編自後封諸王
或王功臣但崇以爵等食其租封而已劉秩所謂設
爵無土署官不職者也今子弟功臣封爵者皆列之
高祖受禪以天下未定廣封宗室以威天下皇從弟及

姪年始孩童者數十人皆封為郡王太宗即位因舉屬籍問侍臣曰封宗子於天下便乎尚書右僕射封德彝對曰不便歷觀往古封王者今日最多兩漢以降惟封帝子及親兄弟若宗室遠疎者非有大功如周之郇滕如漢之賈澤並不得濫叨名器所以別親疎也先朝敦睦九族一切分王爵命既崇多給力役蓋以天下為私殊非至公馭物之道也太宗曰然朕理天下本為百姓非欲勞百姓以養已之親於是卒以屬疎降爵唯有功者

數人得王餘並封為縣公

武德元年六月立世子建成為皇太子封皇子元吉為
齊王封宗室子孝基為永安王道玄為淮陽王叔良為
長平王神通為永康王神符為襄邑王德良為長樂王
道素為竟陵王博乂為隴西王奉國為渤海王

八月涼州賊帥以其地來降封為涼王

十月封從弟琛為襄武王瓊為廬江王

十二月封桂國李孝長為義安王

三年六月封皇子元景為趙王元昌為魯王元亨為
王皇孫承宗為太原王承道為安陸王承乾為恒山王
恪為長沙王泰為宜郡王

四年二月徙封宜郡王泰為衛王四月封皇子元方為
周王元禮為鄭王元嘉為宋王元則為荊王元茂為越
王十二月徙封宋王元嘉為徐王

貞觀二年正月徙封漢王恪為蜀王衛王泰為越王楚
王祐為燕王

五年正月封皇弟元裕為鄆王元名為譙王靈夔為魏王元祥為許王元曉為密王又封皇子愔為梁王貞為漢王暉為郟王慎為申王囂為江王簡為代王

十年正月徙封趙王元景為荆王魯王元昌為漢王鄭元禮為徐王徐王元嘉為韓王荆王元則為彭王滕王元懿為鄭王吳王元軌為霍王幽王元鳳為虢王陳王元慶為道王魏王靈夔為燕王蜀王恪為吳王越王泰為魏王燕王祐為齊王梁王愔為蜀王郟王暉為蔣王漢

王正為越王申王慎為紀王

十一年正月徙封鄮王元裕為鄧王譙王元名為舒王
六月徙封任城王道宗為江夏王趙郡王孝恭為河間
王許王元祥為江王

十三年六月封皇弟元嬰為滕王

二十一年八月封皇子明為曹王

永徽元年二月封皇子孝為許王上金為杞王素節為

雍王

六年正月封皇子弘為代王賢為潞王

顯慶二年二月徙封雍王素節為郇王

文明元年三月徙封杞王上金為畢王郇王素節為葛王

嗣聖元年改封上金為澤王素節為許王

垂拱元年五月封皇子成義為恒王

其年十一月改封千金王復為零陵王

三年正月封皇子範為衛王業為趙王

聖歷三年十二月封皇太子男重潤為邵王重福為平恩王重俊為義興王重茂為北海王

景龍元年五月封韓王元嘉男訥為嗣韓王故霍王元軌長子江都王緒男暉為嗣霍王號王元鳳男巨為嗣號王故紀王慎男安封郡王鐵成為嗣紀王故魯王靈夔孫范陽郡王藹長男道堅為魯王故曹王明孫胤為嗣曹王各賜實封四百戶又封皇從兄境為歸政郡王睿宗子成器為蔡王千里為壽春郡王禧為天水郡王

初侍中敬暉以唐室中興削武氏諸王封宗姓為王爵故有是命也

唐隆元年六月進封皇子衡陽郡王成義為申王巴陵郡王隆範為岐王彭城郡王隆業為薛王

景雲元年十月以故吳王恪孫禕為嗣江王

其年九月封皇太子男嗣直為許昌郡王嗣謙為真定郡王

先天元年八月封皇太子男嗣升為陝王嗣直為郢王

嗣謙為郢王

開元二年十一月封皇第四子嗣真為鄆王第五子嗣初為鄂王第六子嗣玄為甄王

十二年四月封皇再從兄將作大匠禕為廣川郡王再從叔太子員外率更令嗣密王徹為濮陽郡王再從兄太子家令嗣越王琚為中山郡王敕曰傍繼國王禮有停廢以朕紹承休緒永念懿親列於藩輔其禕等可並封郡王

十三年二月封皇第八子琚為光王第十二子濞為儀
王第十三子雲為穎王第十六子澤為永王第十八子
清為壽王第二十子泗為延王第二十一子沐為盛王
第二十二子湓為濟王

二十一年九月封皇子沔為信王泚為義王灌為陳王
澄為豐王漣為恒王浞為梁王滔為利王

二十八年九月封皇太子之子僖為南陽郡王倓為建
寧郡王佖為西平郡王僅為新城郡王僖為潁川郡王

又封慶王子儼為新平郡王仲為平原郡王封棣王子
僎為汝南郡王僑為宜都郡王封榮王子輔為濟陽郡
王偕為北平郡王封儀王子伋為豫章郡王健為廣陵
郡王封永王子陽為襄城郡王封壽王子伾為河間郡
王封延王子倬為彭城郡王封濟王子僚為永嘉郡王
至德二年十二月進封南陽王傑為趙王新城王僅為
彭城王潁川王儻為兗王第九男倓為襄王第十男倕為
興王第十一男倝為杞王第十二男伺為定王

元年建丑月封皇太子第二男邈益昌郡王第三男迥
延慶郡王越王長男建為武威郡王第二男道為興道
郡王彭王長男遠為常山郡王

大曆十年二月封第四子述為睦王充嶺南節度度支
營田大使第五子逾為郴王充渭北鄜坊等州節度大
使第六子連為恩王充汴宋等州節度大使第八子邁
為鄜王第十三子造為忻王充昭義軍節度大使第十
四子暹為韶王第十五子運為嘉王第十六子遇為昭

王第十七子適為循王第十八子通為恭王第十九子
達為原王第二十子逸為雅王

十四年六月封元子誦為宣王次子謨為舒王誦為通
王諒為虔王詳為肅王又封皇子迺為益王迅為隨王
又封彭王第三男適為湯陰郡王襄王長男遙為伊吾
郡王杞王長男連為同昌郡王頴王第六男儼為歙國
公延王第八男代為兗國公陳王第五男佖為潭陽郡
王義王第八男佖為南川郡王恆王長男循為清河郡

王又封蜀王長男訓為東平郡王德王長男謂為恭化
郡王長男讚為武都郡王詔為馮翊郡王

建中元年八月封嗣舒王藻為嗣郢王

三年正月封涇王迢男為延德郡王

四年六月徙封彬王逾為丹王郾王邁為簡王豫章郡
王伋為汧陽郡王

興元元年八月合川郡王李晟改封西平郡王樓煩郡
王渾瑊改封咸寧郡王

晉元元年四月改封晉王誼為舒王

四年四月封皇第七子諒為邕王仍拜開府儀同三司
皇太子長子淳開府儀同三司封廣陵郡王二子渙為
建康郡王三子汚為洋川郡王四子洵殿中監臨淮郡
王五子浼秘書監弘農郡王六子沐漢東郡王七子湜
少府監晉陵郡王八子淑國子祭酒高平郡王九子滋
雲安郡王十子準太常卿宣城郡王十一子浚德陽郡
王十五子浥光祿卿河東郡王十六子況衛尉卿洛交

郡王舒王第二子涉太僕卿寧塞郡王三子汭太府卿
清河郡王睦王子諷太常卿洪源郡王丹王子訪宗正
卿寧邦郡王恩王子誨大理卿景城郡王簡王子証司
農卿平恩郡王忻王子諸太常卿武威郡王韶王子詡
鴻臚卿晉昌郡王嘉王子訢太常卿新安郡王端王子
誠衛尉卿新興郡王循王子護光祿卿平樂郡王

二十一年四月封第十弟諤為欽王第十一弟誠為珍
王男建康郡王沔為均王改名緯臨淮郡王洵為淑王

改名縱弘農王浼為莒王改名紆漢東郡王泳為密王
改名綱晉陵郡王湜為郇王改名總高平郡王淑為邵
王改名約雲安郡王滋為宋王改名結宣城郡王淮為
集王改名緬德陽郡王滑為冀王改名綵河東郡王浥
為和王改名綺第十七男絢封衛王十九男纁封會王
二十男綰封福王二十一男紘封撫王二十三男緄封
岳王二十四男紳封表王二十五男綸封桂王二十七
男繕封翼王庾戌封皇太子長子寧為平原郡王二子

寬為同安郡王三子宥為延安郡王四子察為彭城郡王五子寰為高密郡王六子寮為文安郡王

元和元年八月制封皇太子男平原郡王寧為鄧王同安郡王寬為灋王延安郡王寮為深王高密郡王寰為洋王文安郡王寮為絳王第十男審為建王

長慶元年三月封弟憬為鄜王悅為瓊王恂為沔王懌為發王悖為茂王忱為光王協為淄王憺為衢王忱為澶王皇子湛為鄂王溜為江王湊為漳王澶為潁王令

有司擇禮冊命鄂王尋改為景王

太和八年十月三日敕灋王長子漢可封東陽郡王次
男源可封安陸郡王次男潢可封臨川郡王故深王長
男潭封河內郡王次男淑封吳興郡王故絳王長男
封新安郡王次男滂封高平郡王故洋王長男沛封潁
川郡王淄王長男幹封許昌郡王沔王長男瀛封晉陵
郡王鄜王長男溥封平陽郡王

開成二年八月敬宗皇帝第二子休復封梁王第三子

執中封襄王第四子言揚封紀王第六子成罷封陳王
五年三月故襄王男寀封樂安郡王故陳王第十六男
儼封宣城郡王

會昌六年五月敕長男溫可封鄆王第二男涇可封雅
王第三男滋可封夔王第四男沂可封慶王

大中二年二月封第五男澤為濮王

三年十一月封憲宗皇帝第十七男惕為彭王

五年封第六子潤為鄂王

六年十一月封憲宗皇帝第十八男惲為棣王

八年封第七子洽為懷王第八子訥為昭王第九子汝為康王

十一年封第十子灌為衛王第十一子雍為廣王

十四年封憲宗子懌為信王

咸通三年封長子侑為魏王第二子佖為涼王第三子

佖為蜀王四子侶為威王

初封郡王

封憲宗子愐為榮王

八年封順宗第二十二子緝為蘄王

十三年封第六子保為吉王第八子倚為睦王

中和元年九月十六日封長子震為建王

光啓三年十一月十四日封第二子陞為益王

乾寧元年十月十八日封第二子昶為棣王第三子禕

為虔王第四子禔為沂王第五子禕為遂王

四年正月二十二日封六子祕為景王第七子祺為校

王

光化二年十一月十九日封第八子禎為雅王第十子

祥為瓊王

封建雜錄上

貞觀二年十二月十六日太宗以宇內晏清思以致理
謂公卿曰朕欲使子孫長久社稷永安其理如何尚書
右僕射宋國公蕭瑀對曰臣觀前代國祚所以長久者莫
不封建諸侯以為磐石之固秦并六國罷侯置守二世
而亡漢有天下參建藩屏年踰四百魏晉廢之不能永
久封建之法實可遵行上然之始議分封裂土之制禮

部侍郎李百藥議曰周氏以鑒夏殷之長久遵黃唐之
並建維城磐石深根固本雖王綱弛廢而枝幹相扶故
使逆節不生宗祀不絕秦氏背師古之訓棄先王之道
翦華持險罷侯置守子弟無尺土之邑兆庶罕共理之
憂故一夫號澤七廟隳祀臣以為自古皇王君臨宇內
莫不受命上玄飛名帝錄締構遇興王之運殷憂屬啓
聖之期雖魏武攜養之資漢高徒役之賤非止意有覲
覲推之不能去也若其獄訟不歸菁華已竭雖帝堯之

光被四表大舜之上齊七政非止存情揖讓守之亦不可固焉以放勳重華之德尚不能克昌厥後是知祚之長短必在天時政或盛衰有闕人事宗周卜世三十卜年七百雖淪胥之道斯極而文武之器猶在斯則龜鼎運祚已懸之於杳冥也至使南征不返東遷避逼禋祀如綫郊畿不守此乃陵夷之漸有累於封建焉暴秦運距閏餘數鍾百六受命之主德異禹湯繼世之君才非啓誦借使李斯王綰之輩咸開四履將閭子嬰之徒俱

啓千乘豈能逆帝王之勃興抗龍顏之祚命者也然則
得失成敗各有由焉而著述之家多守常轍莫不情忘
今古理蔽澆淳欲以百王之季行三代之法天下五服
之內盡封諸侯王畿千里之間俱為采地是則以結繩
之化行虞夏之朝用象刑之典理劉曹之末鏤船求劍
未見其可膠柱成文彌所多惑徒知問鼎請隧有懼霸
王之師白馬素車無復藩籬之援不悟望夷之釁未甚
羿浞之災復思高貴之殃寧異申鄆之酷此乃欽明昏

亂自繫安危固非守宰公侯以成興廢且數代之後王室寢微自藩屏化為仇敵家殊俗國異政強凌弱衆暴寡疆場彼此干戈侵伐狐貍之役女子盡髻峭陵之師隻輪不返斯蓋畧舉一隅其餘不可勝數陸士衡方規規然云嗣王委其九鼎凶族據其大邑天下晏然以理待亂斯言之謬也而設官分職任賢使能以循良之才膺共理之寄刺符分竹何代無人至使地或呈祥天不愛寶人稱父母政比神明昔曹元首方區區然稱與人共有

其樂者人必憂其憂與人同其安者人必拯其危豈容
委以侯伯則同其安危任之牧宰則殊其憂樂何斯言
之妄也封君列國藉慶門資忘先業之艱難輕自然之
崇貴莫不代增淫虐時益驕侈離宮別館切漢凌雲或
刑人力而將盡或召諸侯而共樂陳靈則君臣恃禮共
侮徵舒衛宣則父子聚麀終誅壽朔乃云為已思豈若
是乎內外羣官選自朝廷者擢士庶以任之澄水鏡以
鑒之年勞優其階品考績明其黜陟爵非代及用賢之

路斯廣人無定主附下之情不固此乃愚智所辨安可
惑哉至如滅國弑君亂常干紀春秋二百年間畧無寧
歲次睢咸秩遂用玉帛之君魯道有蕩每等衣裳之會
縱使西漢哀平之際東漢桓靈之時下吏淫暴必不至
此為政之理可以一言蔽焉陛下獨照宸衷永懷前古
將復五等而修舊制建萬國而親諸侯竊以漢魏以還
餘風之弊未盡勛華既往至公之道斯草請待珎琬成
璞以質代文刑措之教一行登封之禮云畢然後定疆

理之制議山河之賞未為晚焉中書侍郎顏師古論封建表曰伏聞前年陛下親發聖慮特降明敕博問卿士議欲封建既合事宜實惟理要然而議者不一各執異端或欲追法殷周遠遵上古天下之地盡為封國庶姓羣官皆錫茅社或云凋弊之後人稀土廣封建之事蓋未可行此皆不臻至理兩失其衷臣愚以為當今之要莫若量其遠近分置王國均其戶邑強弱相濟畫野分疆不得過大間以州縣雜錯而居互相維持永無傾奪

使各守其境而不能為非協力同心則足扶京室陛下
然後分命諸子各就封之為置官僚皆一省選用法令
之外不得擅作威刑朝貢禮儀具為條式一定此制萬
代永久則狂狡絕暴慢之心本朝無怵惕之慮特進魏
徵議曰臣聞三代之利建藩屏保入皇家兩漢之大啓
山河同獎王室故楚國不恭齊桓有召陵之舉諸呂構
難朱虛奮北軍之謀九鼎危而復安諸侯傲而還肅比
夫秦之孤立子弟為匹夫魏氏虛名藩捍若圉圉豈可

同年而語哉至於同憂共樂之談百足不僵之義曹冏
六代陸機五等論之詳矣陛下發明詔封五等事雖盡
善特時未遑何也自隋氏亂離百殃俱起黎元塗炭十
不一存始蒙敷至仁以流玄澤沐春風而霑夏雨一朝
棄之為諸侯之隸衆心未定或致逃亡其未可一也既
立諸侯當建社廟禮樂文物儀衛左右頓闕則理必不
安粗修則事有未暇其未可二也大夫卿士咸資祿俸
薄賦則官府困窮厚歛則人不堪命其未可三也王畿

千里地稅不多至於貢賦所資在於侯甸之外今若並
為國邑京師府藏必虛諸侯朝宗無所取給其未可四
也今燕秦趙代俱帶蕃夷黠羌旅拒匈奴未滅追兵內
地遠赴邊庭不堪其勞將有他變難安易動悔或不追
其未可五也夫聖人舉事貴在相時時或未可理資通
變敢進蒟羌之議唯明主擇焉六年監察御史馬周上
疏曰伏見詔書令宗室勲賢作鎮藩部貽厥子孫嗣守
其政非有大故則無黜免臣竊惟陛下封之者誠愛之

重之欲使其胤裔承守而與國無疆也臣以為如詔旨者陛下思所以安存之富貴之未可使為世官也何則以堯舜之父猶有朱均之子儻有孩童嗣職萬一驕愚則兆庶被其殃而國家受其敗正欲絕之則子文之理猶在正欲留之而樂厲之惡已彰與其毒害於見存之百姓則寧使割恩於已亡之一臣明矣然則向所謂愛之者乃適所以傷之也臣謂宜賦以茅土疇其戶邑必有材行隨罷方授則雖其翰翮非強亦可以獲免尤累

昔漢光武不任功臣以吏事所以終全其代者良得其術也願陛下深思其宜使夫得奉大恩而子孫終其福祿也

十一年六月六日詔曰設百司以制海內建藩屏以輔王室莫不明其典章義存於至理崇其賢戚志在於無疆者也今採按部之嘉名參建侯之舊制共理之職重矣分土之實存矣已有詔書陳其至理繼世垂範貽厥後昆維城作固同符前列荊州都督荆王元景涼州都

督漢王元昌徐州都督徐王元禮潞州都督韓王元嘉
遂州都督彭王元則鄭州刺史鄭王元懿絳州刺史霍
王元軌虢州刺史號王元鳳豫州刺史道王元慶壽州
刺史舒王元名鄧州刺史鄧王元裕幽州都督燕王靈
夔蘇州刺史許王元祥安州都督吳王恪相州都督魏
王恭齊州都督齊王祐益州都督蜀王愔襄州刺史蔣
王暉揚州都督越王貞并州都督晉王治秦州都督紀
王慎或地居旦奭夙聞詩禮或望擬間平早稱才藝並

爵崇土宇寵兼車服誠教孝之心無忘於造次報政之
譽克著於朞月宜冠藩垣昨以休命其所署刺史咸令
子孫世世承襲

唐會要卷四十六